

Scuvrir cun pitturar il secret da la vita

Purtrets da Constant Könz i'l Ospidal a Scuol

I's piertans, stüvettas e chombras da la partizium da medicina complementara da l'ospidal regional a Scuol sun exposts pel mumaint purtrets da Constant Könz. I's tratta da purtrets in öli e disegns in culur da rispli.

Daspö ün decenni organisieschan ils respunsabels da la partizium medicina complementara da l'Ospidal a Scuol minch'on ün'exposiziun cun ouvras d'ün artist o d'üna artista. Per gronda part sun quai artists indigens. L'exposiziun da quist on han Melitta Breznik, chi maina la partizium medicina complementara, e Rita Schönthaler, la manadra da la terapia curativa, organisà insembel.

«Quist'exposiziun, chi'd es dedichada al giubileum desch ons clinica curativa in l'Ospidal, vaina pudü far cun ouvras da Constant Könz», ha dit la doctressa Breznik. Hannes Graf, coschefmeidi da la partizium medicina complementara a Scuol, ha agiunt ch'els dettan cun quistas exposiziuns

dad üna vart üna plattafuorma als artists engiadinais, «da tschella vart tocca però eir pro nos concept dad imbellir stanzas e locals cun ouvras d'art. Uschea as vegna plü svelts frisch.»

Purtrets, disegns e publicaziun

I sun exposts 25 purtrets da grond format ed üna trentina da disegns da 20 sün 20 centimeters, «miniatüras in culur da rispli», sco cha l'artist declera. Pro l'exposiziun actuala esa però alch tuot special: Rita Schönthaler chi fa terapias cun as mouver, e l'artist Constant Könz han fat insembel ün cudesch in fuorma da quadern «Die Wärmereihe» cul tema euritmia curativa: «Quista terapia as basa sün set differents suns, per mincha sun ha Constant Könz fat ün disegn e tschernü trais differentas culuors», ha dit Schönthaler, «el lavura cullas culuors in üna maniera sco ingün oter artist ch'eu cugnusch.» Il quadern cuntogna ils differents exercizis da la terapia, per cha'ls paziants tils possan far eir a chasa.

«Plaschair da pudair expuner quia»

A la vernissascha in dumengia avantmezdi d'eiran preschaints numerus indigens e cuntschaints da l'artist ed eir



Constant Könz e Marcella Pult culla monografia. fotografia: Flurin Andry

differents amatuors d'art. Da la partida d'eira eir Marcella Pult, l'autura da la monografia cul titel «Constant Könz / Ragischs ed alas / Radici e ali / Wurzeln und Flügel». Melitta Breznik ha fat üna cuorta preschantaziun da la vita ed ouvra da l'artist. «Constant Könz ha dit üna jada ch'el prouva da scuvrir cun pitturar il secret da la vita. Scuvrir alch

as poja eir cun observar seis purtrets», ha dit Breznik, «eir scha sias ouvras sun abstractas vezzan ils üns umans in seis purtrets, tschels bes-chas, plantas ed oter plü.» Ch'el s'allegra da pudair muosar alch purtrets in Engiadina Basa, ha dit Constant Könz, «eir sch'eu abit in Engiadin'Ota es quai üna regiun chi'm sta fich a cour». (anr/fa)

Ün'ouvra multifara

Constant Könz nascha a Zuoz ils 10 faverer 1929 insembel cun seis frar schemblin Jachen. Il bap Jachen Ulrich es ün architect da Guarda, la mamma Dora Geer es da Zuoz. Il pèr ha fingià ün figl da duos ons cun nom Peider, davo ils schemblins nascha amo Andri. Cur cha Constant Könz ha ot ons as separan ils genituors e lur bap transferischa ils figls a Guarda. Lura marida il bap a Selina Meyer e dal 1940 nascha il tschinchavel figl Steivan Liun. A Cuaira fa Könz il gimnasi, illas vacanzas güdan el e seis frars al bap a restorar sgrafits antics sün chasas. Davo la matura stübgia'l architettura a Turich ed art a Genevra. Daspö 1960 abita'l in Engiadin'Ota sco artist independent. Si'ouvra artistica cumpiglia tant cumposiziuns abstractas sün taila, illustraziuns per cudeschs d'uffants e revistas, pitturas grondas e sgrafits vi da chasas publicas e privatas sco eir fanestras da baselgia pitturadas. Cuntschaint es Könz dvantà impustüt causa ch'el ha fat indombrabels sgrafits vi da chasas privatas in Engiadina ed in otras valladas dal Grischun. (anr/fa)